

## **Savaateqarfinnik pilersitsinernut tapiissuteqartarneq pillugu Namminersornerullutik Oqartussat nalunaarutaat nr. 23, 8. august 1993-imeersoq Atuussimasoq (Historisk)**

Savaateqarneq pillugu Inatsisartut inatsisaat nr. 1, 21. april 1988-imeersoq Inatsisartut inatsisaatigut nr. 8-kkut 13. maj 1993-imeersukkut allanngortinneqartoq naapertorlugu aalajangersarneqarpoq:

**§ 1.** Savaatilinggorlaanut tapersiissutitut savaateqarfiliorneq nalaani tapiissuteqartoqarsinnaavoq.

Imm. 2. Savaateqarfimmud ataatsimut savaateqarfiliorneq imaluunniit savaateqarfiliqqinnermut ataatsimut ataasiaannarluni taamaallaat tapiissuteqartoqarsinnaavoq.

Imm. 3. Tapiissutit sivisunerpaamik ukiut pingasut ingerlanerini akiliutigineqartassapput.

**§ 2.** Inuit savaateqarneq pillugu inatsimmi piunasaqaatinik naammassinnissimasut tapiiffigineqarnissamik qinnuteqaateqarsinnaapput,

1) savaateqarfik nutaarlunnaq tunngavianiit aallartittariaqassagunikkum imaluunniit

2) savaateqarfik imatut pissusilik tigusimagunikkum savaateqarneq imminut akilersinnaasunngortinniarlugu tunngavianiit savaateqarfiliqqittariaqarlutik.

Imm. 2. Qinnuteqaat, Savaatillit Peqatigiit Suleqatigiissunit uppersarlugu atsiorneqarsimasoq, naalakkersuisunut aamma kommunimut savaateqarfiup inissisimaffigisaanut nassiunneqassaaq.

**§ 3.** Naalakkersuisut Savaatillit Peqatigiit Suleqatigiissut aamma "Savaatillit Siunnersorteqarfia" isumasioreerlugit tapiissuteqartoqarnissaanik aalajangiissapput. Naalakkersuisut aalajangiiniarnermini ilaatigut pingaartissinnaavaat

1) savaateqarneq tapiiffigineqartussap siunissami pi- ngaarnerutillugu inuussutissarsiutigissagaa.

Tamatuma nalilerneqarnerani savaateqarfiup angissusia tunngavigineqassaaq,

2) maskiinat atortut, narsaatit neriniartitsisarfillu aamma savaatit imminnut naapertuuttumik annertussuseqarnissaat,

3) narsaatit pilersinneqareersinnagit imaluunniit pilerseqqinneqareersinnagit ivikkanillu nerukkaatissat siulliit pigineqalereersinnagit savaateqartoqalissanngitsoq taakkuluunniit amerlisinneqassanngitsut,

4) savaatillip ingerlatsinermut illuutit ungalullu sanareersimanngippagit imaluunniit

iluarsaateersimanngippagit savaateqartoqalissanngitsoq imaluunniit taakku amerlisinneqassanngitsut aamma

5) savaateqarfiorneq pilersaarutigineqartutut ingerlanneqassasoq.

Imm. 2. Naalakkersuisut ataasiakkaanut tunngatillugu tunngavilersuutit naleqquttut allat pingaarnerutissinnaavaat.

**§ 4.** Tapiissutit amerlassusissaat akiliutigineqartussallu aveqatigiinnissaat kommunip pineqartup Naalakkersuisullu akornanni isumaqatigiissutigineqassapput.

**§ 5.** Naalakkersuisut kommuni pineqartoq aamma Savaatillit Peqatigiit Suleqatigiissut

isumasioqatigeriarlugit aalajangiisinnaapput, tapiissutit akiliutigineqartarnerat unitsinneqassaaq

1) tapiiffigineqartartup savaateqarneq pillugu inatsimmi aalajangersakkat unioqutissimassappagit imaluunniit

2) nalunaarut manna malillugu tapiiffigineqartartup tapiissutinik pisarnissaminut piumasaqaataasut naammassisinnaajunnaarsimappagit imaluunniit

3) tapiiffigineqartartuq eqqunngitsunik imaluunniit paatsoorneqarsinnaasunik paasissutissiisimappat imaluunniit tapiiffigineqarnissamut paasissutissanik pingaarutilinnik nipangiussisimappat.

Imm. 2. Immikkoortoq 1-imi nr. 1 aamma 3 malillugit tapiissuteqartoqartarunnaarpat Naalackersuisut kommuni najugarineqartoq aamma Savaatillit Peqatigiit Suleqatigiissut isumasioqatigeriarlugit aalajangiisinnaapput tapiissutigineqarsimasut utertillugit akilersinneqassasut.

§ 6. Nalunaarut manna atuutilerpoq 10. august 1993.

*Namminersornerullutik Oqartussat, ulloq 8. august 1993.*

Hans Iversen

/

Henrik Leth